

**Permaisuri Agong Raikan Anak Yatim Sempena Keputeraan Agong Bernama
4 Jun, 2013**

KUALA LUMPUR, 4 Jun (Bernama) -- Raja Permaisuri Agong Tuanku Hajah Haminah Selasa berkenan meraikan 360 anak yatim sempena sambutan ulang tahun Hari Keputeraan Yang di-Pertuan Agong Tuanku Abdul Halim Mu'adzam Shah di Istana Negara di sini.

Kanak-kanak tersebut daripada Yayasan Anak-Anak Yatim Sultanah Haminah, Jabatan Kebajikan Masyarakat dan rumah kebajikan pertubuhan bukan kerajaan (NGO) terpilih, diraikan dalam jamuan mesra yang diserikan dengan persembahan tarian dan nyanyian.

Pada majlis itu, baginda berkenan menyampaikan sumbangan berupa seutas jam tangan dan sebuah komputer riba kepada semua anak yatim.

Raja Permaisuri Agong turut berkenan menyampaikan sumbangan wang tunai berjumlah RM1,000 kepada 10 anak yatim yang cemerlang dalam Ujian Pencapaian Sekolah Rendah (UPSR) dan Penilaian Menengah Rendah (PMR) tahun lalu.

Seorang penerima, Mohd Amirul Ikhwan Mohd Izam, 14, memberitahu Bernama dia merasa terharu diraikan dan dapat melihat Raja Permaisuri Agong secara lebih dekat.

"Gembira sangat dapat mai (datang) Istana Negara, diraikan, dapat lagi sumbangan jam dan 'laptop' (komputer riba) dari Raja Permaisuri, rasa syukur," katanya yang berazam untuk memanfaatkan sebaiknya komputer riba itu.

Tuanku Hajah Haminah kemudian berkenan bersalaman dengan anak yatim serta para hadirin sebelum berangkat meninggalkan majlis.

Turut berangkat ke majlis itu Tunku Panglima Besar Kedah Tan Sri Tunku Puteri Intan Safinaz Tuanku Abdul Halim Mu'adzam Shah dan Toh Puan Temenggong Kedah Puan Sri Tengku Maliha Tengku Ariff.

Antara tetamu yang hadir isteri Perdana Menteri Datin Seri Rosmah Mansor, isteri Timbalan Perdana Menteri Puan Sri Noorainee Abdul Rahman, Menteri Pembangunan Wanita, Keluarga dan Masyarakat Datuk Rohani Abdul Karim, isteri Menteri Pendidikan Kedua Datin Seri Che Kamariah Zakaria dan isteri Ketua Setiausaha Negara Puan Sri Rohani Abdullah.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=953918>